

摘藻堂四庫全書薈要

集部

欽定四庫全書薈要

集部

明文衡卷三  
四

詳校官候選知縣臣吳甸華



欽定四庫全書蒼要卷二萬一百五十六

集部

明文衡卷三

明程敏政編

騷

思嬾人辭

宋濂

吾鄉呂成公實接中原文獻之傳公歿始餘百年而其學殆絕濂竊病之然公之所學弗畔於孔子之道者也欲學孔子當必自公始此生乎公之鄉者所宜

深省也嗟夫公骨雖朽公所著之書猶存古之君子  
有曠百世而相感者況與公相去又如此之甚近乎  
聞而知之蓋必有其人矣托物引類作思媿人辭辭  
曰

惟媿人之惛媿兮賦姱質於自然脩蛾規而凝黛兮曼  
目轉以成睒妥鬢髮而如雲兮靨輔巧以承權纖腰秀  
頸若鮮卑兮容都曼而體便娟寶璐縈而右繞兮桂徽  
媚以半偏懸明月以綴佩兮錯木難而傳冠向瑤臺而

微步兮意憺靜以貞閒宓妃之倫折芳馨以相遺兮復  
容與乎江干勢翩翩其褰舉兮若游龍之在淵胡人間  
不可以久留兮遂凌厲乎高寒馮道紀以為御兮鍊天  
和而為飡徑驅馭於陽陰兮時上下乎星辰歎予生之  
何晚兮不一覲於芳儀念姱嫿之鮮雙兮遡迴飈而曾  
思歔愁悴而委情兮氣滄沸以如炊道苟可以還之兮  
視萬里猶門墀登嶇嶇而騁望兮正晨旭之蒼涼氛曠  
豁而閭朗兮莽山川之縱橫樹輪盤糾而柴虎兮蘋草

藿靡以相望豐狐思羣而永嗥兮文鵠慕類以徐翔企  
精爽之不徠兮空雲龍之將將蹇佗僚而望絕兮耀靈  
習其西藏降崇丘而臨曠野兮循故轍以東歸向闌楯  
而徙倚兮境外嬰而愁內滋新蟾皎以出天兮想纖美  
之曲眉繁星爛而成文兮懷繡帔之陸離蒼灝霏落而  
無滓兮思玉體之弗緇拂蘭袖而起步兮復經緯乎空庭  
苦鴻雁之靡靡兮厭羽蝨之薨薨撼戶櫺以悲惻兮惕瞽  
容而弗自勝轉曲牖而入堂壇兮牀獨坐對乎華鐙鐙

影搖曳如鳥羶兮象中心之靡寧寒厖狺狺而競吠兮  
耳恍聞於楚音疾倒屣以啓關兮飈闔葉於枯岑縹緲  
綿而莫抒兮托幽寄於瑤琴琴聲咽而思深兮類孤雌  
之鳴陰更寂寞以將闌兮斗杓旋而向東舒枕衾而就  
榻兮期夢寐以潛通精氣注以弗釋兮橋有物而衡中  
息纚纚以方微兮魂翕翕而上征造旬始而謁太儀兮  
羣靈續其若鼓氛旄溶以隨焱兮鳳旂沛而嬰空馭象  
車而秉虬節兮鞭列缺以斥豐隆豹舋熊幡聿皇以奮

兮繆流紆譎營以相蒙左撝右衛動以綳環兮脩脾脩  
淵雲溺而雷春回穴轡纚汨以奔歛兮吸噉瀟率謂以  
蒙鴻穆眇眇以前邁兮翩紛紛而弗止莽冥冥以無垠  
兮勢皇皇而迤靡超氛埃而俶郵兮竟按轡乎朱陵長  
麗舉躅以向日兮有赫戲之華文揚芒燦以上焱兮朶  
重離之丹門炫赤玉之寶章兮列八龍之威神歛東趨  
於蒼極兮青瑊紛其竝迎羣神衍衍以方饗兮奏靈和  
之鳳笙四酎芬而味歆兮暈玉色而帶頰揖素威以升



皓宮兮盼四極之浮浮辱收顧余而破顏兮錫鏤瓊之  
華鉤謂貞白以自守兮合左契於伊周折寒門而燭玄  
冥兮朔颼颼以吹裘有夫玄巾而擐甲兮握靈蛇以為  
驅重陰沍而未啓兮肅玄氛之幽幽四方非不可居兮  
悵所思之莫余都馳兩轂如飛凡兮又滔滔而遐逝靈  
氛告余以吉故兮子何為兮獨悲苦彼中天之有居兮  
隔人世之風雨吾將導子之一至今庶弗愆於恒素怡  
忽荒以從之兮駕剛飈以徑度習光炎之炘炘兮緜纚

鬱快而不可正視雕甍彤楹屹以上起兮瀏濫弘愴雲  
譎而波詭連卷櫬倂杳以軋笏兮歲魁幼眇矗以高峙  
中洞房之沕穆兮乃媼人之攸居使曼姬為予通訊兮  
儼再拜乎堂垂忽朱扉之洞開兮移玉趾之委蛇珠明  
玉潔不足以為喻兮光照耀乎東西吐芳辭以若蘭兮  
意勤勤而告余曰皇降靈兮昭質弗沫毋染爾穢兮昧  
厥施紉葯襦兮曳菹蒻結蕙纓兮張椒幃酌桂漿兮嚙  
蓀糜索胡繩兮畦揭車集衆芳以遠蒸兮羗郁郁而斐

斐余俯首而敬聽兮書肇紳以自規海色動而報曙兮  
陶去幽而開寤雖嘉辭之盈耳兮邈若人其何處遂捫  
膺以沈思兮鵲獨處而繚戾也誠因言以會心兮將神  
交於千載也亘天地而無初終兮惟我民之秉彝道弘  
敷於上下兮必有人而繫之往者固不可作兮幸方冊  
之昭如日叅驗於厥躬兮若面命而耳提跼蹐之嫠嫠  
兮固難齊於六驥能孳孳而弗怠兮亦千里之可至余  
雖質脆而力單兮敢不沾沾而奮厲帶鈎矩而佩衡兮

撤部蒙而祛爵期有形以必踐兮始俯仰而無媿縱不  
得媿人以與之游兮又何異同功而竝世

予既為此辭嘗錄一通寄王子充子充盖有志同  
予學呂者書以識之庸俟異日各考其學之成也

孤憤辭

宋濂

中州人士有無罪而被廢斥者識與不識咸寃之濂  
因本其志為著孤憤之辭使世之用法不慎者讀焉  
其或知所懼也夫辭曰

哀予生之匪淑兮，耿鬱紆其誰語。恐此心之難白兮，假微詞以自吐。曩有志乎學古兮，指前脩以作則。非秋蘭奚敢紉兮，非申椒吾馬食。仗所履之正直兮，謂無施而不可。悲世塗之嶮巇兮，曾獨中茲危禍。胡萋菲之小文兮，竟成之於貝錦。剛指方以為圓兮，揆人情為已甚。伊翩翩之公子兮，余素得而友之。握手以示肺肝兮，若斷金而弗疑。何中心之多變兮，一旋踵而弗予識。既擠予於坑穽兮，復彎弓而下石。汝面目之無怍兮，曾何謀之

弗深縱禍予其曷傷兮吾懼戕汝之良心覩日月之光  
昭兮聞雷霆之隱眈予固不足畏兮汝寧不畏于天天  
道微而難索兮斯焉足以責汝彼黃鳥之嚶嚶兮猶求  
友而弗止將七尺之美軀兮乃一禽之不如予固約結  
而罔措兮又為汝而歔歔嗟受命之蹇蹇兮豈獨汝之  
為尤蛟龍鬪於深淵兮寧無損於鱗鰓沙雖不我陷兮  
予安往而逃囚唯飲泣而無所訴兮傷予罪之不當蒼  
天之至明兮獨不鑑我之幽枉

叶於良切

皎皎之白璧兮僉

訾其為燕石也纖纖之素縞兮反謂其如玄漆也欲力  
詆以深文兮其奚患於無辭咎繇之不吾出兮眼有淚  
而誰知誓剖心以自明兮念父母之所遺苟自經於溝  
瀆兮慮君子之見唾夜漫漫而不旦兮悲風颯其四來  
秋蟲響於空堦兮似助予之悲哀六合之至廣兮寘一  
身而無所魂魄恍恍若有忘兮雖生存而如死昔公治之  
所遭兮夫何有於不仁在縲紲而非罪兮亦魯叟之所  
稱果自反而弗疚兮縱遇辱其如榮浮雲過而日潔兮

春冰釋而水清外累不足以爲愆兮愆吾德之未明意  
欣欣以超絕兮振冠纓而起行取瑤琴以彈之兮有和  
衍之新聲樂天命以自度兮究年歲而不再更

題王子充琴邊秋興圖辭

詹同

風泠泠兮木落山盤盤兮雲陰吾將鼓兮秋水誰能識  
兮此心

弔董生文

胡翰

余自京師南歸次于直沽汴流而達于衡漳過陵縣



故廣川地也或曰漢江都相董仲舒墓在焉為文弔  
之其辭曰

出國門以南邁兮涉衡漳而濟舟波流渾其若河兮道  
既阻而且脩臨廣川之故墟兮曰夫子之首丘望原隰  
以懷思兮悵欲去而夷猶嗟王風之不競兮人各驚其  
私智道術裂而民散兮世已久而莫制燕趙固多奇士  
兮僅有取其忼慨非天降大雅兮緊孰為之表礪聖垂  
法於春秋兮志雖微而可即士明經以致用兮義非后

而不食徵天人以為言兮明灾異之在昔引君致之當  
道兮情眷眷於隄側嘉堯舜而樂三代兮得一士而不  
能用苟不用其亦已兮國無人而曷重黜質直而見憚  
兮弘飾詐而取寵用舍倒而莫察兮邪正溷而彌冗駢  
不中夫犧牲兮執鸞刀而薦犂登饗味以實瓚兮漑黃  
流而注茲競利方以為員兮攬渠瓊而去之徒操末以  
齊本兮引繩墨而止之下皇皇而靡所騁兮上訑訑以  
為得孰好賢如緇衣兮孰惡惡如蒼伯古固難於知人

兮詎多欲而不惑庸俟時之見察兮廢師言之允一謂  
伊尹無以加兮雖管晏弗之企探淵源其尚眇兮又豈  
游夏之儔類何一低而一昂兮驟未量乎夫子之志曰  
正誼而明道兮不計功而謀利皦內顧而如斯兮揆王  
佐亦奚異俾詭遇以獲禽兮固吾心之所羞比柳下之  
三黜兮由直道以事人百里之飯牛兮豈污辱而忘身  
道有時而詘兮亦有時而伸諒天命之未違兮獨奈何  
乎生民

閔貞淑文 胡翰

卷三

何斯世之昧昧兮，耿獨抱茲貞淑。曰降命之自天兮，固眇軀之所服。肇兩儀於厥初兮，恒正位而竝育。矧夫人之伉儷兮，豈云疏而異族。昔結髮以承歡兮，將偕老以爲期。忽惡筭之在首兮，遂中道而棄之。惟國有大事兮，莫大於征伐之師。既北面以奉命兮，願委質以驅馳。冒白刃以爭先兮，懼不得其所死。苟死弗嫌于素兮，又安足以痛毀相女婦之從夫。兮醢一齊而不再力，莫拯君

之阡危兮雖獨生其何待孫神之戌夏兮陳逆髮而捐  
軀高廩之喪趙兮秦瞑目而與俱卓怒行其威教兮皇  
甫係而猶諾李斷臂於逆旅兮負疑骸以貽後諒風猷  
之一致兮曠年歲而不可殫襲芳菲以紉蘭兮又佩之  
以雙玦仰三辰之在天兮心炯焉其昭晰即所安而自  
得兮吾竊哀丈夫之非烈

懷龍門辭

劉基

有美一人兮美且都青霞為衣兮白雲為裾被秋蘭兮

佩珣玕泰和與遊兮中黃與居瞻望弗及兮芳歲其徂山  
高水深兮道阻且紆安得羽翼兮致我與俱

有美一人兮美且仁自我不見兮不知幾春仰玄穹兮  
盼參辰為合為離兮誰識其因青冥無階兮江海無津  
安得羽翼兮致我與隣

有美一人兮在山中蒼眉青鬚兮玉雪其容飲沆瀣兮  
食紫虹淥石泉兮灑松風邀初平兮從赤松超逍遙樂  
兮無窮安得羽翼兮致我與同

九嘆九首

秋風起兮夕露溥浮雲沈陰兮白日晝寒木葉落兮水  
泉乾孤鴈鳴兮悽以酸攬余轡兮悵盤桓野蕭條兮行  
路難豺狼驕兮狐兔頑蘭蕙死兮荆棘蕃我欲奮飛兮  
無羽翰援雅琴兮發哀彈絃斷絕兮涕汎瀾

我髮種種兮颯如其稀我心悵悵兮忽若有遺過吾不  
能改兮德吾不能知往者不可悔兮來者不可期進無  
益于世兮退將安歸嗚呼已矣兮吾寧不悲

天有田兮不可以耕山有龜兮不可以知咎徵刈蒿以  
為梁兮削菌以居楹匠石却走兮工垂拊膺登高望遠  
兮觀四瀛水東流兮日西傾殷紛紛兮各有營我獨展  
轉兮從夜達明

風飄飄兮揚塵野寂寞兮無人舟何為兮山阿車何為  
兮水濱北望楚兮東望秦倒江河兮亂星辰天門窈窕  
兮重九閨願有言兮遠莫陳虎豹颺兮為喜為瞋橫流  
涕兮瞻蒼旻心馮噫兮不能伸麋有角兮龍有鱗空山



寂寥兮吾誰與隣

江無舟兮河無梁  
隰有荆棘兮而無稻粱  
鷹化鳩兮雀變隼  
狸為貙兮龍為蚓  
蜃長顧兮情紆軫  
九疑高兮禹穴幽  
梧桐枯兮鳳不留  
山木慘慘兮叫鵲鵲  
飛兮無所投  
雲杳杳兮雨悠悠  
孰懷情兮知此愁

虎厭肉兮騶虞苦饑  
獬升堂兮麒麟受羈  
黃彛薦滫兮章甫承綦  
箭韶屏棄兮絃筦兜離  
指玉以為石兮削方以為規  
天不可問兮神不可咨  
繫彼之是兮而此之非

有樗在林兮有櫟在廬著龜孔昭兮勿遠余思

今夕何夕兮天宇清步逍遙兮仰觀列星河漢皎兮北  
斗橫悲風發兮候虫鳴林鳥起兮沙鵝驚長夜寥寥兮  
何人哭聲愴恍恨兮不忍聽回身入房兮淚沾纓蛟虬  
偃蹇兮豺虎獐弧無弦兮車說其衡知不可慮兮誰女  
令蹇淹留兮難為情

履霜思裘兮燠則棄之臨河號舟兮濟而置之不網胡  
魚兮不弋胡鵠翦薙杞梓兮索灌莽以取木捕猫乳鼠

兮僉以為仁吠狗宵警兮行者怒瞋彈鷺養泉兮莫知其  
咎斲冰以承宮兮曷云能久長太息兮有所思林木動  
兮巢鳥悲山有藿兮園有葵心懷君兮君不知

秋天沈寥兮百草黃蟋蟀悲吟兮朝榮有芳屣屣起兮  
獨徬徨心悠悠兮懷故鄉原有粟兮隰有禾桂花紅兮  
蘭紫芽涼風動兮松栢馨流潦落兮水泉清蔬可茹兮  
秫可酒集鄉里兮會親友坐白石兮蔭蒼筠翫明月兮  
思古人魚歸淵兮狐首丘終余生兮安所求

招遊子辭

王禕

吾宗兄存誠甫名其齋居曰遠遊昔者屈原放逐之  
餘眇觀宇宙欲制鍊形魂排風御氣浮遊八極後天  
而終以盡反復無窮之世變故遠遊之歌所為而作  
今存誠之有取於遠遊也豈猶原之志歟予因反其  
意為辭以招之庶幾其不驚於虛遠而為吾聖賢之  
歸然宋玉景差大小招務為譎怪之談荒淫夸豔之  
語今亦無取焉辭曰

遠遊雖樂兮樂不可極只子兮來歸無東無西無南無  
北只東方弱水舟輒覆溺只西方流沙車不可歷只北  
方太漠絕人跡只南方炎荒路險以棘只顧瞻四方蹙  
蹙歷所適只遠道雖樂將焉止息只子兮來歸反吾故  
居只居爾之居復爾初只仁以為宅遂且虛只以禮為  
門義為塗只大中為室至和為厨只八珍奇味道之腴  
只文章燦爛錦繡敷只盛德光華被厥軀只慈儉是實  
謹蓄儲只御以矩矱乘恕輿只子居其中樂有餘只瞻

前無隣後無虞只天君泰然靜以舒只聖賢與處天為  
徒只洞視八荒眇一區只坐閱千古猶斯須只子母遠  
遊苦馳驅只子兮來歸反故居只

弔伍子胥辭

高啓

覽勾吳之故墟兮灌莽鬱其龍莖館娃廢而為沼兮歸  
伍胥之遺宮奚千祀而勿毀兮繫若人之死忠昔窮逋  
而渡江兮奮孤跡於羈旅既入郢而雪耻兮又棲越而  
攘侮使彼吳之強大兮非夫子而孰為何夫差之自喜

兮遽勿戒而荒娛陳昌言之悃欵兮寔不忍視國之阡  
危衆以子為巨信兮肆讒辭之詆欺夫豈不能全身遠適  
以自庇兮顧先王之舊德卒待隕而何言兮恨終不能  
寤君之嬖惑載鳴夷兮浮遊魂魄惇惇兮在中流江神念  
子兮哀憤鼓洪濤於高秋嗟君子之出輔兮孰不願為  
伊臯使言從而志行兮致雍熙之陶陶何齟齬而多患  
兮惟重華之不可以屢遭鄂侯諍而就醢兮龍逢諫而  
見屠蓋自古而有之兮匪夫子獨罹乎此辜身雖歿而

義安兮又舍是將焉索彼循默而苟容兮寧獲免乎訛  
額想子猶念夫故都兮或乘雲而來歸顧荆棘之多露  
兮應攬涕而歔歔余亦何為而感慨兮懼直道之墜也  
聊陳詞而表烈兮亦邦人之志也

雲林辭

并序

蘇伯衡

常人之情未有不好繁華而厭澹泊者也入山林而  
唯恐不深適江湖而唯恐不遠非抗志幽憂寄懷爽  
曠者孰能之六一居士曰錢塘四方之所聚百貨之



所交物盛人衆為一都會而又兼有山水之美以資  
富貴之娛吾祖東坡先生以為吳興山水清遠其民  
足於魚稻蒲蓮之利寡求而無所爭賓客非有事於  
其地者不至焉是二邦固皆東南勝處而吳興之境  
寬閒寂寞豈比錢塘之鉅麗雄富哉崔彥暉氏錢塘  
人也顧去之而之吳興營別業一區名之曰雲林小  
隱於是乎僑焉此其以澹泊為樂而不奪於繁華之  
習為何如彥暉非抗志幽負者歟寄懷夷曠者歟夫

以端木賜之賢又有仲尼為之依歸其於道德之足  
貴紛華聲利之不足尚固宜曉然若薰蕕不待辨而  
孰去孰取也然交戰于胷中猶且有所不免况彥暉  
當問學之士徇於外物而競於邪侈之際乃能決於  
去就如此豈直異乎尋常之人而已使克推是志以  
學道其於去卑陋而趨高明也何難哉此余不識彥  
暉而信其賢因張尚禮之請本其情為賦雲林辭曰  
春吾父母之邦兮廼趙宋之故都既美麗又富盛兮實

東南之奧區衆人胥此焉止息兮吾獨曷為而去諸此  
富貴者所娛情兮雖信美不可以居矧吾舍之湫隘兮  
直闌闌而臨通衢車塵瀟若溽霧兮紛冉冉將挽予苟  
徘徊而不去兮幾何不為逐臭之夫瞻彼樂郊兮震澤  
之墟俯蒼莽之平蕪阡陌縱橫以碁冥兮聚落交錯若  
畫圖審面勢兮構吾廬梁桂檀兮柱杉櫨不雕不琢兮  
不丹青以塗墍葺薜荔以幘幪兮苔蘚繡乎階除列陵阜

以為垣兮因澗谷而成渠長松鉅竹兮森扶疎烟條霧  
葉兮蔚蔽虧天矯繚糾兮若蒼龍之垂胡荈麗披離兮  
若翠幄之流蘇積雨之後日出之初山氣澤氣孰吹孰  
噓排我簷楹畧我綺疏栖我几席襲我琴書始膚寸其  
來會兮旋波濤之卷舒乍奔騰以翕霍兮儵充塞而糝  
糊何變化之奄忽兮茫洋莫辨乎四隅幻萬象以一色  
兮覆六合而有餘中長風之迅烈兮遂消液於須臾晷  
掃滅而無蹤兮杳不知其所如但見山青青而林蒼蒼

兮掩映湛湛乎之太虛吾危坐而睇眄兮增感慨以長  
吁曰寶莫寶兮貝玉金珠貴莫貴兮爵位名譽等浮雲  
之不可把翫兮喟嘆先聖其豈我誣胡彼昏之不覺兮  
爭貿貿以奔趨况人壽之百歲兮猶過隙之白駒縱得  
之亦何補兮徒自默而自劬吾於世兮復何需屑逐隊  
兮競馳驅聊歛退而從吾所好兮放浪肆恣於水滢山  
礪幸麋鹿之我狎兮喜鷗鳥之不我虞春草蘼茂春華  
敷若紅澗綠張鸞旣幽泉發竇疾以徐髣髴會朝鏘珩

踞娛耳悅目樂不可言兮世間埃壒何濡濡時招玄真  
子膾却赤鯉魚相就東老舊酒壚既醉涉江弄芙蓉歌  
曰澤有荷渚有蒲荷為衣蒲為蓆衣且食兮保我軀滯  
志釋兮煩慮祛逍遙委蛇兮又何必訪偃佺於蓬壺

弔茂陵文

方希古

祇明祀而言旋兮指槐里以西征停策憇于道旁兮覩  
高丘之崢嶸即故老而訊之兮惟漢武皇之茂陵整冠  
裳而疾趨兮躋遺廟以屏營淒風起于叢棘兮鼙鼙嘯

于幽瑩慨雄心之靡託兮悲曼志之無成惟君皇之御  
極兮邁炎靈之方熾陋堯禹為未足遵兮卑祖武而弗  
肯繼內瘠民以自殖兮外震威乎遐裔騁車轍于八荒  
兮候神人于海濱建千門與萬戶兮殫土木之奢麗希  
軒轅之騰化兮永傲睨乎斯世何盛業之易隳兮洪謨  
鬱而難宣雖暫弱于西北兮生民疲弊而不痊奇禍機  
于亟蠱兮妃涓丁毒而銜冤諒逞心于屠滅兮抑天道  
之致然闢土疆之宏廓兮曾玄宮之莫固赫兵革之繁

庶兮委守衛于草露城闕之崇敞兮求斷礎而無所後  
宮之韶冶兮僅或傳其塚墓像祈連以旌武兮想壯魄  
之已腐嗚呼哀哉形必有盡兮孰不有亡匪君皇之獨  
然兮尚奚為隱惻而迴遑惟祈生之已甚兮或妖誑而  
過望謂長年而卒老死兮斯足垂戒于昏荒明固有所  
不達兮智固有所短偉才畧之英邁兮哲與愚其相半  
賴表聖而黜邪兮兼善悔而能斷雖人恫而財竭兮  
終克免乎危亂悼往者之無知兮尚來者之可諫感盛



哀之相襲兮仰昊天而永歎

退菴辭

楊士奇

芝棹兮桂戶山阿兮水滢雲鱗鱗兮石磊磊交松蘿兮  
延薜荔華芬芳兮襲予春之蘭兮秋之蕙羌何為兮獨  
徃舒蕭散兮洩洩念盛衰兮有時盍滿盈兮豫戒撫年  
歲兮將晏日斯征兮月斯邁紛駸駸兮忘歸余何為兮  
靡止攬吾轡兮旋軫返吾車兮舊里恬澹兮以休全之  
兮終始懷夫子兮高風邈游心兮千載

辭劍圖辭

胡儼

貫弓兮執矢望昭闕兮東馳思公子兮弗諼孰閔余兮  
渴饑旦暮兮以趨江之流兮清且漣漪彼遑遑兮求索  
渺浩蕩兮何之纍纍兮遺孤心之悲兮莫予知風蕭蕭  
兮江日黃蘼蕪綠兮杜蘅芳野間寂兮無人悅四顧兮  
彷徨桂擲兮松舟儵汎汎兮中流攬余兮既濟欲報兮  
焉酬寶劍兮陸離爰解贈兮莫我留執圭兮弗有顧百  
金兮何求江上兮大人義重兮山丘撫新圖兮增慨寄

遐思兮千秋

冰雪軒辭

右春坊右諭德兼翰林侍講金公幼孜以冰雪名其  
軒君子有以知其素矣而或者弗察也故予為賦焉  
余既好此奇服兮爰昭昭以自持厲潔清之端操兮將  
古人以為期廓壅蔽之黥黥兮披汙穢而去之歲冉冉  
而易邁兮唯昭質其未虧際嘉時之晟明兮乘青雲而  
上征凌天路以翱翔兮軼埃壒而抗旌朝吾遊夫清都

兮夕余憇乎扶桑鑿瓊枝以為食兮吸沆瀣以為漿秉  
余心之貞懋兮肆志志其昌已雖所處之固然兮亦率  
余之素履匪善吾弗好兮匪德吾弗庸保厥美以上下  
兮暨予心之所同何時俗之多佞兮紛馳騁以自強汨  
汶汶而莫知止兮乃謂予為匪臧曰悶悶與昏昏兮孰  
萬物之我先斯伯陽之為道兮夫子乃嘆其賢何明哲  
以多智兮亦營營於土田後千祀而猶顯兮羌孰得而  
舍旃磽磽易缺兮皦皦易汙塊獨守以為姱兮何不改

乎此度衆欣欣以周容兮何吾與之寡也中怲怲以自  
信兮豈若是而舍也猗前聖之遐遠兮渺茫茫其何之  
余將就而問之兮質予行之所宜精專專而內凝兮神  
剴剴而外揚俄惆恍以流從兮忽超乎余有行駟玉虬  
以前導兮彼白虎為後驅遭吾道夫不周兮造顓頊之  
所居飄風蕩而吹衣兮玄雲翳其承宇冰峩峩以凝沍  
兮雪紛紛而交下炯皓曜以相射兮清氣迫而襲余晁  
然令予開朗兮神蕭爽而情舒命玄冥以導予兮謂余

言之纚纚曰太素之淳懿兮斯為物之所始嗟人之生  
兮稟其淑靈理粹而純兮氣厚而清湛旦旦而弗亡兮  
豈庶類之可羣彼其謂子之不然兮夫豈守玄之子雲  
殷湯之博大方乃銘器而諄諄去舊染之垢污兮圖皎  
然而日新孔聖之大成兮曰吾涅而不淄皜皜其不可  
尚兮亦秋陽而暴之相矩獲之在茲兮信舍是其焉求  
俗幽昧以眩惑兮吾於彼其何郵駕余輶以回轉兮條  
臨睨夫舊居謹余轡而正策兮意揚揚以自虞積雪以

為壇兮斲冰以為宇余固處此而不遷兮庶有酌於此  
世重曰結予心之耿耿兮增予思之悠悠清白以為服  
兮憑往則而信脩道曼曼其超遠兮予曷日而忘之

弔余青陽李江州詞

周叙

元鼎兮沸飈典常紊兮不綱撫長劒兮橫視屹江淮兮  
保障金戈兮鐵馬時不利兮摧傷寧甘心兮一死濺頸  
血兮清塘孤忠兮大節挺勁草兮秋霜正學兮雄詞揆  
雲漢兮天章赫青編兮偉烈配巡遠兮睢陽煥昭昭兮

日月永千古兮爭光

凝遙睇兮江州屹孤城兮上流弔英魂兮何在慨元政  
兮不脩政不脩兮佚游偉郡侯兮良壽訓兵兮繕甲擁  
猛士兮貔貅羣兇張兮援絕天不祚兮奚尤臨大節兮  
不奪凜勁氣兮橫秋匡廬兮我我渺大江兮悠悠君令  
名兮同永增余心兮頓憂

竹坡辭寄金川蕭樂善

劉定之

莽落木兮蕭森風不止兮葉琤琤夕陽沒兮迴光見遠



岫兮何千層我之懷兮既悲況所思兮繫之竹坡兮何  
所吹秋籟兮參差美人兮在其下文蕙菁兮懷幽雅蔭  
清陰兮以憇握琅玕兮盈把歲云暮兮霜霰寒君不來  
兮行路難浮雲東征兮不可攀倏變化兮成素鸞就君  
之竹兮棲縹緲永今夕兮以盤桓

明文衡卷三

欽定四庫全書薈要卷二萬一百五十七

集部

明文衡卷四

明程敏政編

樂章

擬祭告天地樂章

凡十三首

梁寅

禮局中承詔分撰郊社宗廟樂章故有此作其音調  
乖戾雖不可被之箎弦然出於上命不敢棄其草謹  
錄藏之

迎神

天道大矣物繇以生地道廣矣物因以成惟鴻恩是資  
惟禋祀是明神之格兮瞻續紛其並迎

奠玉幣

奠以嘉玉栗而溫兮薦以重幣燧其文兮庶鑒茲哉斯  
禮之存兮

奉牲

既虔我祀既具我牲角貴繭栗心之誠有必其芬于豆

于登五音會合而平

上帝酌獻

仰明明瞻巍巍如事父粟以夔物莫稱德曷報之酌用  
陶匏斯其宜

地祇酌獻

勢廣厚德含弘五行具百物生承天之施功之成何以  
報貺醑惟馨

上帝亞獻

父事惟天格神以心赫赫在上洋洋若臨樂既具止有  
錙其音酌言再之庶明明之降歆

地祇亞獻

母事惟地物無不載九穀既登百貨是賴罔敢煩而瀆  
罔敢忽而怠昭茲嘉貺沛兮未有艾

上帝終獻

禮行匪懈祀事孔明瑶席菲菲華鐙煌煌豐我粢盛潔  
我豆觴陰陽之和邦家之昌

地祇終獻

六府孔修生我兆民富媪之功陸海之珍洞洞屬屬清  
醑以陳所佑維德禎祥其臻

分獻

鸞輿下臨從百神金支秀華耀五雲壇我我靈欣欣位  
以序列享明禋

徹俎

禮嚴厥初尤慎乎終徹以示敬儀雍雍嘒嘒管簫五音

從

望燎瘞

在繅早維玉在篚維幣禮從厥初迺燎迺瘞疑屹以  
瞻匪終怠

送神

神飈若馳喬雲上翔蒼龍並騰車以行顧茲瑤壇分尚  
有榮光

擬朝會樂章

凡十二首

王景



天命有德之舞

嘉禾進

堪輿寧叶氣蒸萬彙出嘉禾生祥飈瑞露凝光精一莖  
九穗有三登田畯駿奔進天廷薦宗廟將德馨時和歲  
豐樂太平乃知天子在樹德雲龍風虎開休禎

野蘭成

瑞道昌至治明萬化滋植盈八荒猗歟野蠶集我條桑  
載生載成以玄以黃以登于明堂至和磅礴黼黻文章

繅為五采絲上補虞舜裳

騶虞獻

騶虞至周服至仁表天造飢不食生畜行不踐生草聖  
皇御宸極德澤被枯槁林邑神聖初召南風化首邁遐  
躅前無偶啓貞符垂永久

神龜呈

箕疇演洛之靈元龜出聖之徵皇孝理表八紘役五神  
策六丁肩五總符十朋介金石利永貞天子九九八十

一萬歲壽與天齊并

黃河清

黃河清七百里水精宮下見底聖人在位天心合并六  
合澄清萬國文明捐雜佩兮蒲津遺玉珎兮龍門川后  
謁而陳辭兮錫蕃釐于聖君

四夷來

天子踐祚宏拓皇謨義聲翕沓陰肅陽嘘東欸扶桑西  
徼余喜瀚海祝栗統為一家繩牽索引咸傳于都莫不

震懼天休涵濡狉狉以拱宸樞玉帛匪頌王會有  
圖萬歲千秋協我貞符

明德新民之舞

黃河澄清

聖人召和黃流獻奇澄波清且漣漪歆薄龍門震盪坤  
倪萬雷吐張光燭化機上下一碧機動天隨天啟聖神  
河水為清天啟聖神治化底成聖德天齊造化降精聖  
德天齊心與道凝萬國一統聖聖相承

嘉禾同穎

祥開函宇地出嘉禾端倪叶應大瑞是荷同穎異畝瑞  
協周家以濯仁風以昭泰和惟皇忠厚被草木懋昭大  
道同變化是知聖心能致和上與天運同亨嘉

慶雲成彩

德動天鑒慶雲呈祥紛為華蓋燿為天章郁郁芬芬  
黼黻茫茫映日烜彩隨風飛揚昭回麗河漢覆燾彌下方神  
聖揚清芬溥暢融天光

龍馬來廷

天之駟龍之媒產大宛徵渥洼追流星箭天街汗流赤  
心九垓歷閭闔觀玉臺西風十二閑爭稱龍馬來蹴踏  
五雲暖神光夜昭回詆蕩蕩天門開

甘露降祥

和氣叶甘露凝昞寶菟軼金莖厭厭浥浥穰穰熒熒而  
於粲其英如飴如飴如珠如脂不隨日以晞天子神聖  
與天合德至和攸繹以濡天液天子聖仁與天同甄至

和氤氲以播靈芬瑞應之彰有苾其芳於萬斯年受天之慶

四夷咸賓

聖皇御天治化攸甄文武並用其幾孔神極日月之所  
照莫不獻贄而效珍普天率土悉妄悲臣環拱北辰以  
沐至仁德懋被乎習爽聲教暨乎八蠻陋漢唐之用師  
侈成周之王會其道斯何王者無外

擬朝會樂章

凡二十六首

顧祿

升座

樂奏泰安之曲

金門洞開寶座尊崇煌煌龍衮穆穆聖容俯臨萬國高拱九重臣民稱賀玉帛來同

公卿入門

樂奏治安之曲

萬乘天臨千官景從濟濟卿士秩秩王公簞班駕蹕接武夔龍同心協德永効公忠

上壽

樂奏壽安之曲

天眷聖皇應運開基尊臨大寶撫有華夷武功底定文



德弘施微臣曷報仰稱壽卮

君親之重實為臣綱至尊至敬著在天常仙韶按曲玉  
醴浮觴載伸華祝萬壽安康

舉酒

樂奏嘉禾之曲

有美嘉禾勃如雲興一莖九穗異畝同榮至和所召盛  
德之徵厲諸郊廟用慶豐登

樂奏卿雲之曲

天上垂象著于卿雲九苞鳳彩五色龍文迎風郁麗映

日網緼有徵斯應實惟聖君

樂奏紫蓋之曲

聖人受命紫蓋呈祥亭亭錦覆煜煜霞張天中屹立雲際飛揚眷茲靈祐國祚隆長

樂奏彤旗之曲

在昔征伐旗纛為先仰惟聖朝著象于天彤竿對峙赤羽文鸞克敵之應萬方歸焉

樂奏神芝之曲

后祇效德神芝挺生曄曄三秀濯濯九莖紫蕤絢彩綠  
葉敷榮願著聲歌播于大廷

武功之舞

聖主承天運臨濠樹義旗萬方沾酒日一劍奮興時采  
石方收捷金陵即駐師神機安可測建此萬年基

大命歸真主羣心屬至尊神功參造化英畧定乾坤永  
洽雍熙治弘惟曠蕩恩華夷俱奉貢冠帶入天門

六成

江漢親征日風雲睿算中六師方奮武孤寇已潛蹤矢  
石飛星急樓船烈火攻興王天已祚次第靖羣雄

萬乘龍飛始東吳尚陸梁天兵將問罪驕虜敢稱王負  
固三時久終成一戰降山河畿甸接表裏壯金湯

陝右遺梟獍山東據虎狼神威方遠及小醜孰能當飲  
馬黃河上觀兵華岳傍來蘇人望切載道獻壺漿

王師若時雨隨地霈恩波東浙爭歸款南閩已戢戈山  
川回正氣田野起謳歌一洗兵塵淨羣生樂泰和

巴蜀雖云險區區在一隅偏方寧自守逆豎謾狂圖正  
類蛙藏井真成虎負隅神兵飛渡入俄報定成都  
大將承王命長驅向北征揮戈清朔土按轡入燕城圖  
籍登天府車書混玉京從容歸奏捷萬姓共歡迎

文德之舞

一統皇圖大三陽泰運開王侯鳴珮入蠻貊獻珠來瑞  
靄騰金闕祥雲護玉階太平人物盛鼓舞樂春臺  
雞鳴欲曙天冠蓋集羣賢拜舞瞻龍座懽愉侍御筵玉

杯傳法醞仙樂奏宮懸願祝君王壽齊稱億萬年

六成

五彩眩晴虹神都王氣鍾石城嚴踞虎鍾阜鬱蟠龍宮  
闕天光近金湯地勢雄四方均貢賦萬國敬來同

皇朝崇祀典聖主每齋心天地嚴昭格神祇肅降臨牲  
牢歆大享金石奏清音三獻精誠至端知錫福深

創業知非易圖安念守成帝心常簡注皇業在經營脩  
德承天意推誠軫物情一人恢大業萬國仰昇平

盛典稽前古皇心協至公建儲安國本裂土錫王封玉冊加殊禮金支衍大宗羣臣無以贊三祝但呼嵩

宵旰思賢切旁求滿四方山林登隱逸朝野慶明良際遇風雲會瞻依日月光同心匡盛治竹帛永流芳

中國聖人興羣方仰大明海波俱帖息年穀屢豐登玉帛來諸國梯航貢上京臣民咸舞蹈萬歲賀朝廷

還宮

洪惟聖主端冕凝旒高躋舜禹遠邁殷周功成治定禮

備樂脩受天之祐萬歲千秋

補雩壇祝舞歌辭

宋濂

周官有司巫掌羣巫之政令若國大旱則帥巫而舞雩漢法夏不雨祀竈母舉土功更火浚井暴釜于壇杵臼于術為四通之壇於邑南門外方七尺植赤繒七其神蚩尤祭之赤雄雞七玄酒具清酒擗脯祝齊三日服赤衣拜跪陳祝辭以丙丁日為赤火龍一長七丈又為小龍六長三丈於南方皆南向壯者七人



皆齋三日服赤衣而舞之司空嗇夫亦齋三日服赤  
衣立之鑿社而通之閭外之溝取五蝦蟇錯置社  
之中池方七尺深一尺酒脯祭齋衣赤陳祝如初取  
三歲雄雞豕猪燔之四通神宇令民闔里南門開里  
北門幸得雨報以豚一酒鹽黍財足以茅為席然周  
制久廢典午以降漢法亦不行而祝辭尤闕歲丙申  
夏旱羣巫雩于山川之神予既書其事授之復補其  
辭使巫歌舞焉

於泰鴻冒下民動以化時屈伸燁朱鳥萬物甄元則害  
陽畢屯土膏耗翦欲瘠田峻奔勢維磧壇四通倭明神  
神中臨勃如煙

幽嘉錫燦若羅繭握薦承炳簪蕭灌鬱金菊芳茱氣上  
延合溟濛洞五精貫八幬茫無外莽脩脩門沆碣駕以  
焱俯下土無不釗

鬱行風羽輪翔玄黃變慘復夾衆嫫集亢景章夢然存  
索之亡燥陰明迴叢陽符翹襟逝弗忘崇明裡成穡功

憑紺筵嚴以邛

應上公與天通植赤繒駢紅龍左列缺右豐隆流火降  
鉅若鴻鬼婦劉散為風灑靈注徧四封函斯活穎茸茸  
衆維魚兆已從

融祉暉毓宵氓甫田阜物豫成風平平綽以行人專與  
鬼盼蠻耿曜振霈充盈神心暢樂茫良四寓綏萬國洋  
洽大康慶昭膺

廣漢難辭

宋濂

難古禮也周人三時皆行之春冬之季難難陰氣也

仲秋之月難難陽氣也蓋二氣或佚厲將乘之為災  
故難以止焉其制命方相氏帥百隸索室毆疫以逐  
之又磔牲以禳四方之神漢襲周制而其儀加詳選  
中黃門子弟百二十人為侏子赤幘皂製執鼗方相  
黃金四日蒙熊皮玄衣朱裳執戈揚盾十二獸有衣  
毛骨中黃門行之冗從僕射將之以逐惡鬼於禁中  
夜漏上水朝臣會侍中尚書御史謁者虎賁羽林郎

將執事皆赤幘陞衛乘輿御前殿黃門令奏曰侂子  
請備逐疫於是中黃門倡侂子和其辭凡八十言繼  
作方相與十二獸儼謹呼徧前後省者三持炬火送  
疫出端門門外騎士以次傳火棄雒水中自漢至今  
朝廷之難雖廢而民間猶有存者先臘一日巷陌社  
隸飾鬼神貌御五色龍虎文衣巡門擊鼓而難之予  
惡其言鄙褻因疏古者用難之意復廣漢辭使習焉  
其辭曰

陽陰乘化左右而行日歷昴畢得積屍大陵其氣勃芒  
更涉虛危墳墓西司鬼官攸房厲附強陰而降于繫殃  
咨爾十二神宣其威良焱突劔亢拂胃食虎甲作食凶  
雄伯食彪騰簡食不祥攪諸食咎伯奇食夢祖明強梁  
共食磔死寄生委隨食觀錯斷食臣剗其腎腸窮奇騰  
根同享於蠱母使害傷咨爾十二神鍛爾戎兵出輶四  
方吮厲之益以代酒漿解厲之肌以充糗糧絲厲之腓  
織以為衣裳斥除慝陰暢回明陽乾坤載清物櫟民邛

惟爾神之功神或不覆上帝是明急急如律令

銅井迎送龍辭

唐肅

伐鼓兮吹簫迎我龍兮山椒龍之都兮何所泉淵淵兮  
石為戶扣龍車兮乞靈龍不出兮我心若醒我心若醒  
兮龍寧弗聞

我扣龍兮龍卹風旋波兮龍出龍之出兮福予變旱燒  
兮為澍龍為澍兮我弗飢返山椒兮雲旗風冷然兮龍  
之歸

迎日辭

鳳炙兮麟脯瑶席兮桂俎樂萬舞兮如雲吹笙竽兮龍  
二女旌子牙兮載以輿六蒼虬兮歷天衢雲霓霏兮夜  
未艾執長轡兮久相待

代祀漢光武皇帝辭

劉定之

漢光武皇帝享國餘三十年垂統過二百年祀典越  
千數百年而弗替何其盛哉竊嘗以為武功文治帝  
者之所難兼自漢諸帝言之武無競於高祖而以在



位日淺故不暇給於文文莫懿於太宗而以繼體守  
成故無所事於武兼之者帝也至其量時度力閉關  
却質置孝武之功於度量之外明慎政體總攬權綱  
包孝宣之治於範圍之內帝之所就出乎漢諸帝之  
右有若此者則其盛也不亦宜乎惟聖天子重登大  
寶祭告于帝而臣實來供事爰述其槩而繫以辭曰  
木蒼蒼兮山風安玉體兮充宮皇靈兮如在亘古今兮  
曷窮杳南巡兮舂陵舊鄉過故都兮洛之陽復北返兮

至茲稅龍駕兮徜徉鑑芳潔兮禋祀飄何往兮瑤空無  
際夜闌兮天漢橫烟參旗兮斜曳皇應侍兮上帝之所  
永錫福兮聖世

琴操

飛泉操

宋濂

浦陽玄麓山有飛泉濂與鄭原先生數觀之造飛泉  
操鼓之琴書諸崖石其辭曰

飛泉兮瀏瀏洗耳固非兮誰飲我牛覆謂我污兮移彼

上流具人之形分奈何忘人之憂

琴操二首

客有吏於海東者以能擊貪暴聞然終用是受誣嘔  
血死予友胡徵君為著哀辭一通予讀之甚悲竊取  
其意作哀海東傷妖女二操使善琴者彈而和之客  
之鬼或有知則其鬱鬱之氣庶幾少伸矣乎辭曰

我哀東海而思之苦彼何人斯猛噬如虎我不擊之我  
民之憂縱不我與覆以我為仇蒼天雖高冤其有極非

血之嘔曷明心赤泱泱大風沈沈寒泉舍旃舍旃我尚  
何言

右哀海東

有妖者女顏如舜英詆我以醜我其何傷眩白為黑古  
亦多有自尤不遑敢誰之咎黃鵠飛來其音閭閭我心  
苟安何戚弗欣天上下地命也奈何命也奈何

右傷妖女

思沂操

胡翰

曾氏有居越者睠焉不忘曾之舊鄉余以聖賢之道  
不下帶而存也作思沂操以廣其志云

沂之水分泱泱曷不歸兮以浣我裳我思兮孔長沂之  
水分湜湜曷不歸兮以沐我德我思兮心惻沂可思兮  
亦可沂予鼓而舞兮喟吾之與兮

風雷引

烈烈兮轟轟為颶兮為霆迅發兮震驚薄太虛兮下上  
聲謂天憐兮孔仁孰司柄兮赫厥靈民無愕兮載寧威

既揚兮沛澤零

在陳操

劉基

彼山有楊兮彼隰有栩  
彼路斯何兮孔棘且阻  
玄雲杳冥兮不日以雨  
重華寂寥兮誰與晤語  
茫茫九州兮孰為予所  
龜蒙無人兮駕予歸處

古琴操

王禕

春秋時晉大夫有從事于外而不得養其母者作皇  
天操

皇天至仁冒下土兮林林總總各獲其所兮我獨何為  
不得以養其母兮育我鞠我亦已太苦兮養之弗時我  
何為者兮自我徂征離此膝下兮有食孰以食疾痛其  
孰摩撫兮我之念母心焉如縷兮母之念子亦豈寧處  
兮皇天之毒我其終我祐兮

右皇天操凡十韻

戰國時楚臣有忠其君而被竄逐者作江漢操

江漢滔滔曰注于東只豈惟江漢百川朝宗只臣之事

君所盡者忠只臣忠之盡見謂為狂只我君聖明如日  
正中只豈弗臣察其或未遑只抑臣實有罪盡反諸躬  
只自今以往矢益竭衷只臣雖身遠臣心上通只臣心  
之通君終臣容只謂臣不信江漢其同只

右江漢操凡十一韻

廣琴操十首

并序

朱右

操者操也君子操守有常雖窮阨猶不失其操也其  
音節固古詩騷辭之體然詩以興騷以怨操以操作



廣琴操廣云者題義因韓子之舊也

將歸操

孔子之趙聞殺鳴犢而作

河之深兮誰將厲之河之淺兮誰將揭之河洋洋兮不  
我濟之竭澤以漁兮蛟龍辟之覆巢殒胎兮鳳凰去之  
夫人有知兮予實類之九州博大兮將予遂之

倚蘭操

孔子傷不逢時作

習習谷風以陰以雨巖穴幽阻誰其晤語猗蘭之芳燼  
燼其光不我佩服昊天孔明子如好脩維我之求子如  
不好於我何郵

龜山操

孔子以季桓子受女樂諫不從望龜山而作  
維龜有山造初鴻濛自龜之東淮夷來從膏澤既施草  
木實多周公上天奈龜山何

越棠操

周公作

天之聰兮聵聵其音天之明兮窅窅其深天之仁兮實  
臨下民文王在上兮於穆不已浩浩其天兮時暘時雨  
越裳來臣兮萬物斯覩

拘幽操

文王羑里作

羑之陰兮杲杲羑之室兮幽幽嗟室之人兮為死為囚  
匪維伊愆兮實我之郵日月有明兮容光弗留

岐山操

周公為大王作

自邵有家于夏之先克承弗怠瓜瓞綿綿開我邠宇衍  
我宗裡嗟狄之人敢乘以奸彼岨矣岐將遂于遷既有  
我土毋戕我民

履霜操

尹伯奇無罪為後母譖而見逐自傷作

驅車驅車車行無遲兒在中野父寧不悲驅車驅車車

行無違免當有母孰使免飢天生衆民罔不同仁風雨  
霜露實活烝庶民生有知以順天賦

雉朝飛操

牧犢子七十無妻見雉雙飛感之而作

雉于飛山之陞孤雄咏羣雌隨雉于飛音下上陰陽和  
鳴聲暢胡我人朝出薪入無家徂歲年

別鵠操

商陵穆子娶妻五年無子父母欲其改娶

其妻聞之中夜悲嘯穆子感之而作

黃鵠雙飛朝隨暮歸山川悠邈不女乖離今當乖違且  
復徘徊女咏女飲母使女悲

殘形操

曾子夢見一狸不見其首作

狸維獸不見其首我夢之形吉凶曷究式協于占載觀  
其繇曰脩爾躬自天之佑

望歸操

高啟

哀周復子死於虎而作

兒旦而出于山之麓兮  
兒夕不歸在虎之腹兮  
我往無所榛蒙龍被谷兮  
嗟爾耽耽弗食我豕犢兮  
穴亦有子胡寧使我獨兮

明文衡卷四



總校官庶吉士臣張能照

校對官庶吉士臣陳墉

謄錄監生臣吳魯

謄錄監生臣張浴曾

欽定四庫全書薈要

集部

明文衡卷五

六

詳校官候選知縣臣吳甸華



欽定四庫全書薈要卷二萬一百五十八

集部

明文衡卷五

明 程敏政 編

表牋

乙巳年賀千秋節表

朱模

五百年有王者興適當今日千萬歲願聖人壽茂對昌  
辰天地協祥臣民交慶中賀繼天立極歛福錫民應禱  
而生彌誕神光之室乘時而起肇基王氣之都是皆天

眷之所隆夫豈人謀之可致故十載克成乎大業而四方益闡於丕圖江漢既已朝宗閩廣固宜職貢餘浙正須秉麾而順邊淮豈待仗鉞而從蓋將北定乎中原抑宜入承乎正統一人有慶萬福攸同某等遠牧虎藩遙瞻象魏莫克對紫宸而拜益深伸丹悃之誠航海梯山重譯悉圖於王會普天率土三呼咸比於華封

代翰林院勸進表

蘇伯衡

伏以纘百王之正統莫大乎宅尊得萬國之驩心宜先

於建極蓋惟體元而居正斯足應天而順人是以高帝

開基甫四載而即位于汜水世祖興復僅一年而踐祚

于鄱南雖遠畧之不遑而不稱之是講義有攸當道在

隨時中謝欽惟躬膺厯數之歸德合乾坤之大玄符額

握江左首平黃鉞再麾潯陽遙定僭偽兼收於漢孽提

封奄奠於樊襄來享來庭南交廣西隴蜀于壇于理左

濠泗右河淮含齒食毛者咸懷僊戴阻兵恃險者悉就

誅擒推聖人兼愛之心委上將專征之任義旗所指羣

帥之內附肩摩仁聞所孚連城之款降踵至蓋師出以  
律而民遂其生斯不戰而屈人故大悅而歸已今則士  
誠梟首於闕下會稽通籍於域中弓矢永橐輿圖載闕  
此皆二儀協贊以申保佑之休百神効靈以開混一之  
運豐功盛烈之著揆諸二帝則已多大寶鴻名之膺質  
諸兩漢則已晚是雖聖明謙讓之節夫豈幽顯仰望之  
情臣念眷命不可久違謳歌難以固拒輒陳愚懇冒瀆  
宸嚴伏望仰體天心俯從人欲特頒明詔俾擇良辰誦

其禮而正其名以其德而居其位則郊廟社稷萬靈永  
有所主華夏蠻貊億載得以承事

國子學賀登極表

寶歷在躬應千齡之上聖瑤圖啟運得百姓之驩心臨  
御云初謳歌為盛

中賀

欽惟聰明天縱剛健日新仗尺

鈞以定羣雄道符漢祖歷一紀而成大業功邁唐宗陶匏  
繭粟以歲祀而上帝時歆詩書禮樂以造士而下民祇  
若風行雷動敷治象於多方春育海涵播仁聲於庶類

仰正統之誕紹知景命之永延凡在生成罔不虔賴臣  
等獲觀鉅典幸際昌期車同軌書同文行同倫致治恭  
陳於善頌黨有庠術有序國有學敷言願贊於成能

代翰林院賀登極表

皇穹垂佑誕錫貞符哲后挺生丕承正統華夷永賴臣  
庶均驩中賀欽惟匹馬渡江六龍御極大明建國八綏  
咸圖於照臨洪武紀元九域同歸於戡定於昭駿烈有  
赫鴻猷臣等仰沐恩波叨居翰苑雲從龍風從虎幸逢



千載之昌期河出圖洛出書願啟萬年之文運

代中書省賀平杭湖秀越表

伏以近悅遠來率土歸聖人之德南征北伐無敵為王者之師適瞻齊斧之特班遙見捷書之滄至羣情胥慶一統維期中賀臣聞高帝開基載興齊楚之役太宗啟運復加充實之誅夫欲和衆而安民則必兼弱而攻昧事非得已兵不留行茲蓋伏遇皇帝陛下智勇自天聰明冠世廓清區宇番禺衣被乎恩光循撫遐荒燠道上

供其方物顧茲浙右尚阻華風爰致斯赫之威用副侯  
蘇之望收海陽以遏其衝要定秦郵以擣其腹心濠梁  
泗水舉若摧枯臨淮壽春取如拾芥計益窮而負固地  
逾蹙而偷生宸慮彌切於解懸戎車遂勤於再駕勢成  
掎角人効智能引領義旗親黨之投戈恐後允懷仁聞  
謀臣之稽顙爭先茗雪首平吳松繼下齒錢唐於郡縣  
登會稽於版圖崑山傳檄而從距牙斯拔檣李攄誠而  
附藩屏悉空叛將就磔於藁街禁旅環攻其外郭茲雖

天眷實出廟謨殲厥渠魁佇看虞之不臘維其士女幸  
覩堯之授時臣等叨列星垣獲觀露布烟火萬里式歌  
神武之功干羽兩階永底文明之治

代秦王府官謝表

伏以誕膺景命開車書一統之基衆建懿親為宗社萬  
年之計茲肇開於土宇遂董正於宮寮

中謝

臣歷觀夏

商以及周漢方其授茅土於子弟孰不任忠良為股肱  
蓋凡前後左右之人罔非吉士則得修齊平治之術斯

為令王今神聖之膺圖仰皇王而取則方立經陳紀之始  
為宗子維城之規況秦國始封奄有關內而形勢百二  
在其域中府署之開傳相之設固將藩屏帝室豈惟保  
佑王躬宜得重臣以申器使臣等經文緯武才不及於  
曹參博古通今學有慙於賈誼夫何僥倖乃辱甄收此  
蓋伏遇覆載等乎乾坤將曲成於庶物高明齊乎日月  
靡求備於一人斯巧鈍之微踪亦叨塵於華選臣敢不  
虔恭夙夜苟非唐堯虞舜之道焉敢陳牴牾訓謨罔俾

河間東平之賢專其美

進大明律表

宋濂

臣聞天生烝民不能無欲欲動情勝詭偽日滋強暴縱其侵陵柔懦無以自立故聖人者出因時制治設刑憲以為之防欲使惡者知懼而善者獲寧傳所謂獄者萬民之命所以禁暴止邪養育羣生者也譬諸禾黍必刈稂莠而後苗始茂方於白粲必去砂礫而後食可飡苟梗化敗俗之徒不有以誅之雖堯舜不能以為治夫自軒

轅以來代有刑官而五刑之法漸著其詳弗可復知逮  
魏文侯師於李悝始采諸國刑典造法經六篇漢蕭何  
加以三篇通號九章曹魏劉劭又衍漢律為十八篇晉  
賈充又參魏律為二十篇唐長孫無忌等又取漢魏晉  
三家擇可行者定為十二篇大槩皆以九章為宗歷代  
之律至於唐亦可謂集厥大成矣洪惟皇帝陛下受億  
兆君師之命登大寶位保人臣民孳孳弗怠其訓迪舊  
臣諄復數千言惟恐其有犯慈愛仁厚之意每見於言

外是大舜惟刑之恤之義也矜憫愚民無知陷于罪戾  
法司奏讞輒惻然弗寧多所寬宥是神禹見辜而泣之  
心也唯貪墨之吏承踵元弊不異白粲中之砂礫禾黍  
中之稂莠也乃不得已假峻法以繩之是以臨御以來  
屢詔大臣更定新律至五六而弗慊者凡欲生斯民也  
今又特敕刑部尚書劉惟謙重會衆律以協厥中而近  
代比例之繁姦吏可資為出入者咸痛革之每一篇成  
輒繕書上奏揭於西廡之壁親御翰墨為之裁定由是

仰見陛下仁民愛物之心與虞夏帝王同一哀矜也易  
曰山上有火旅君子以明慎用刑而不留獄言獄不可  
不謹也書曰刑期于無刑言辟以止辟而民自不敢犯  
也陛下聖慮淵深上稽天理下揆人情成此百代之準  
繩實有易書之奧自行見好生之德洽于民心凡日月  
所照霜露所墜有血氣者莫不上承神化改過遷善而  
悉臻雍熙之治矣何其盛哉臣惟謙以洪武六年冬十  
一月受詔明年二月書成篇目一準之於唐曰名例曰



衛禁曰職制曰戶婚曰廩庫曰擅興曰賊盜曰鬪訟曰詐僞曰雜律曰捕亡曰斷獄采用已頒舊律二百八十八條續律百二十八條舊令改律三十六條因事制律三十一條掇唐律以補遺一百二十三條合六百有六分為三十卷其間或損或益或仍其舊務合重輕之宜云謹俯伏闕廷投進奉表以聞臣等誠惶誠懼稽首頓首謹言洪武七年月日具官臣等上

進元史表

伏以紀一代以為書史法相沿於遷固考前王之成憲  
周家有監於夏殷蓋因已往之廢興堪作將來之法戒  
惟元氏之有國本朔漠以造家用兵戈以爭強并部落  
者十世逐水草以為食擅雄長於一隅逮至青吉斯之  
時大會鄂諾河之上始尊位號漸定教條既近取於奈  
曼復遠攻於回紇渡黃河以蹴西夏踰居庸以瞰中原  
太宗繼之而金源為墟世祖承之而宋錄遂訖立經陳  
紀用夏變夷肆宏遠之規模成混一之基業爰及成仁

之主見稱願治之君唯祖訓之式遵思孫謀之是遺自  
茲以降聿號隆平豐亨豫大之言鼓倡於天厯之世離  
析渙奔之禍馴致於至正之朝嬖幸蠱惑於中權姦蒙  
蔽於外漢網祗因於疏濶周網遽至於陵遲風憲皆為  
不捕之猫將士盡成反噬之犬由是羣雄角逐九域分  
風波徒沸於重溟海嶽竟歸於真王中謝欽惟皇帝  
陛下奉天承運濟世安民建萬世之丕圖紹百王之正  
統大明出而燭火息率土生輝迅雷鳴而衆響微鴻音

斯播載念盛衰之故即推忠厚之仁僉言實既亡而名

亦隨亡獨謂國可滅而史不當滅特詔遺逸之士欲求

議論之公文詞勿至於艱深事迹務令於明白苟善惡

瞭然在目庶勸懲有益於人此皆天語之丁寧愈見聖

心之廣大於是命翰林學士臣宋濂待制臣王禕儒士

臣汪克寬臣胡翰臣宋禧臣陶凱臣陳基臣趙堦臣曾

魯臣趙方臣張文海臣徐尊生臣黃篪臣傅恕臣王錡

臣傅著臣謝徽臣高啟分科脩纂故上自太祖下迄寧

宗靡不網羅嚴加搜采恐翫時而愒日每繼晷以焚膏  
故於五六月之間成此十三朝之史況往牒舛訛之已  
甚而他書參考之無憑雖竭忠勤難逃踈漏若自元統  
已後則其載籍無存已遣使而旁求俟續編而上進愧  
其才識之有限弗稱三長兼以紀述之未周殊無寸補  
臣濂忝司鈞軸幸覩成書信傳信而疑傳疑僅克編摩  
於歲月筆則筆而削則削敢言褒貶於春秋仰塵乙夜  
之觀期作千秋之鑑所撰元史紀三十八卷志五十三

卷表六卷傳六十二卷目錄二卷通計一百三十萬六千五百餘字謹繕寫成百二十冊隨表上進以聞

謝恩表

劉基

伏以出草萊而遇真主受榮寵而歸故鄉此人人之所願欲而不可得者也

中謝

欽惟皇帝陛下以聖神文武

之姿提一旅之衆龍興淮甸掃除羣雄不數年間遂定中原奄有四海神謨廟斷悉出聖衷舜禹以來未之有也臣基一介愚庸生長南裔疎拙無似其能識主於未

發之先者亦猶巢鵲之知太歲園葵之企太陽以管窺  
天偶見於此非臣之知有過於人也至於仰觀乾象言  
或有驗者是乃天以大命授之陛下若有鬼神陰誘臣  
衷開導使言非臣念慮所能及也聖德廣大不遺葑菲  
遠法唐虞功疑惟重之典錫臣以封爵錫臣以食祿俾  
臣回還故鄉受榮寵以終其天年臣竊自揆何脩而膺  
此犬馬微忱惟增愧懼已於洪武四年二月初四日到  
家謹遣長男臣璉捧表詣闕拜謝聖恩臣基無任激切

屏營之至謹奉表稱謝以聞

封建親王賀東宮牋

高啟

鑒國撫軍久繫兆民之望建邦作輔大頒同姓之封隆  
典式脩輿情均慶恭惟皇太子殿下地居震長道合乾  
剛孝奉兩宮每問安於曉寢友懷諸弟共講學於春坊  
既膺主鬯之崇復舉分茅之盛本支茂衍宗社奠安某等  
忝預台司敢伸賀悃河如帶山如礪永存萬世之傳日  
重光月重輪敬上千秋之祝



進千家姓表

吳沈

臣沈等言臣聞古者天子建德因生賜姓胙土命氏此  
姓氏所由興也三代以前有姓以別婚姻氏以辨貴賤  
所由來尚矣三代以後姓氏寢廣推原其始有以帝王  
名號為氏者有以王父字為氏者有以所生之土為氏  
者有以官有以爵及謚為氏者有以所封之國若邑若  
鄉若亭為氏者有以技以物為氏者故往往姓同而氏  
則分年代既遠族類蕃於是氏為姓而索之族矣歷

漢唐宋元生齒之盛華夷之混又有以部落為姓者有  
因功賜姓者有因過因事因刑改姓者有避諱避仇避  
難避嫌改姓者有慕前賢名字冒姓者有音訛及音同  
文異或文同音異轉姓者有省文省言轉姓者其區分  
類別不可勝紀前代雖有氏族志等書流行于世類皆  
蒐羅未盡互有詳畧識者病之恭惟皇帝陛下誕膺天  
命混一區宇車書萬里薄海內外遐陬僻壤咸沾沐聖  
化安土樂生黎庶阜蕃又非前代之比臣等謹稽諸史

牒質之圖籍旁搜博訪類萃成編約為韻語凡為姓一  
千九百六十有八名曰千家姓繕寫呈上極慚膚淺未  
能悉備萬幾之暇得賜覽觀刊布四方以便初學習讀  
天下之人有以知聖朝土地廣大人民衆盛恩德深厚  
而思各保其族於悠久以同躋仁壽之鄉也洪武十四  
年五月朔日翰林編修臣吳沈典籍臣劉仲質臣吳伯  
宗等誠惶誠恐稽首頓首謹言

進實錄表

解縉

奉天輔運推誠宣力武臣特進光祿大夫左柱國太子

太師曹國公監修國史都總裁官臣李景隆等誠惶

誠恐頻首上言聖人受命啟萬世之鴻基史氏纂書

示百王之大法是故堯舜之事載之典謨文武之道布

在方冊俾文獻之足徵實古今之通議矧創業垂統者

皆在於貽謀而繼志述事者敢忘於紀載鋪張極盛之

閔休揚厲無窮之偉績歷選前聞之作允為達孝之規

欽惟大明太祖聖神文武欽明啟運俊德成功統天大

孝高皇帝應千年之景運集羣聖之大成天命眷顧之  
隆起徒步不階於尺土人心嚮服之誠未三年已定於  
京都龍飛雲從而華夏蠻貊罔不率俾日照月臨而山  
川鬼神莫不攸寧有過化存神之妙有綏來動和之應  
英傑不期而會遐邇不令而從盡收當世之賢才大拯  
生民於水火羣雄歸命者不殘一夫元主遁荒而禮遣  
其嗣四方幅員之廣亘古所無中國先王之典悉復其  
舊守帝王心法之言明聖賢道學之統罷黜百氏彌綸

六經範圍造化曲成萬物天休滋至而兢業貫乎始終  
諸福畢臻而謙抑純乎表裏在位之久三十餘年升遐  
之日萬方哀悼比於近古邈然罕儔漢高年不登於中  
壽光武運僅紹於中興唐高祖因隋之資宋太祖承周  
之業元世祖席累世之威皆未有若斯之盛也欽惟孝慈昭  
憲至仁文德承天順聖高皇后天生聖善克相肇基則  
徽德邁於嬪妃開創功超於胥宇夙聞文定之祥允叶  
坤元之吉螽斯有百男之應鴈鴈均衆子之恩保合承

天之慶簡能造化之仁歷考古后妃蓋莫盛於周室然  
摯任有誕聖之祥而無輔運之跡邑姜有輔運之迹而無  
誕聖之祥矧皆起邦君式克承世緒降及近世皆非等  
倫若夫同起布衣化家為國正位中宮十有五年家邦  
承式天下歸仁誕育聖躬萬世永賴自古以來未之有  
也欽惟皇帝陛下合體乾坤重華日月煥帝堯之文章  
續武王之繼述孝事太祖有見而知之之實廣詢當世  
得聞而知之之詳發蘭臺記注之書而徵以藩邸之副

金匱石室之秘又考於世家之藏爰當嗣位之初首

頒脩史之詔命臣景隆忠誠伯臣茹璫翰林學士臣解

縉總裁翰林學士臣王景禮部尚書臣李至剛侍讀臣

胡靖臣曾日章臣黃淮臣胡儼侍講臣鄒緝臣楊榮臣

金幼孜臣楊士奇修撰臣李貫臣吳溥編修臣楊溥臣

鄭好義檢討臣王洪博士臣張伯頴臣王汝玉典籍臣

沈度臣潘畿待詔臣王廷齡給事中臣朱絃吏部郎中

臣徐旭禮部郎中臣胡逵戶部主事臣端孝思太常博士



臣錢仲益國子博士臣金玉鉉助教臣王達行人臣蔣  
驥僉事臣劉長吾知府臣劉辰知州臣鄒濟知縣臣王  
褒臣楊觀臣梁潛臣趙季通臣沈瑜教諭臣劉宗平臣  
解榮訓導臣羅思程臣傅貴清晉府伴讀臣蘇伯厚靖  
江府教授臣張顯儒士臣端禮臣楊孟力臣朱逢吉臣  
莫士安纂脩慎選多士賜宴便蕃即開館於禁中屢繙閱  
于幾暇以百人之多歷期年之久惟盡校讐之力實無  
黼黻之能巍巍道冠於百王蕩蕩功超於千古是知禮

樂征伐之自出必有訓詁之文雲霞花卉之生色不勞  
繪畫之功開玉府而見璫璣惟自虔其希遇仰青天而  
瞻象緯又奚罄於名言皆據事而直書不假一辭之贊  
美但續次以成編永示萬年之大訓謹撰述大明太祖聖神  
文武欽明啟運俊德成功統天大孝高皇帝實錄一百  
八十三卷繕寫成一百六十五冊謹伏闕上進臣景隆  
等無任瞻天仰聖慚懼屏營之至謹奉表以聞永樂元  
年六月十五日奉天輔運推誠宣力武臣特進光祿大

夫左柱國太子太師曹國公監脩國史都總裁官臣李  
景隆誠惶誠恐稽首頓首謹進

賀交趾平定表

黃福

天地以生物為心四時順序聖人以安民為德一視同  
仁干戈橐戢而海宇清平禮樂脩明而神人歡慶恭惟  
皇帝陛下與天同運如日方中齊虞舜之文明重華協  
帝邁周武之功烈廣大如天顧德威之所加惟遐邇之  
咸服聲為律而身為度車同軌而書同文夫何交趾之

炎荒敢外中華之聲教爰稽厥土寔古頑夷在漢唐僅  
能羈縻至宋元尤為叛服逮乎黎醜仍踵弊風負井蛙  
之見而自尊致涸魚之禍而莫悔奈何簡定之餘孽復  
效前尤繼而季擴之狡童再循覆轍逞狐鼠之威而蹂  
踐疆域恣蛇虺之毒而吞噬邦人邊塵瀰漫蟻聚蜂屯  
之是覩田里蕭索雞鳴犬吠之不聞盡傷造物之心憤  
激神人之怒皇上每垂戒諭屢擴至仁彼乃愈肆跳梁  
恣為不道爰興睿算用命偏師天戈一指而蟻穴盡空

風帆再舉而鯨濤頓息渠魁既殄遺孽悉除共惟拯救  
之勤式慰徯蘇之望班師振旅喜文德之誕敷行賞錫  
封覲武功之載戢郡邑有守令以懷保衛所有士馬以  
隄防千年草莽之區變為禾黍之地累世雕題之  
衆化為衣冠之民衣食足以養生絃歌足以易俗輿  
圖舊物于以光復山川精彩于以發舒賦列九州不止  
金人之貢化均萬里遠踰銅柱之功氛祲廓清雨暘時  
若實由懋先之盛德冠古之隆功致今日之太平雪前

代之遺恨也臣顧慚微賤幸遇聖明垂憫愚蒙有罪特  
加寬宥位階卿輔受恩實荷深洪始詔開百粵之新藩  
遂令掌二司之重寄拜命惟謹懼德弗堪易俗移風勉  
承流而宣化彰善瘴惡誓激濁以揚清遠慕臯夔之良  
尚隆唐虞之治然遐陬之地雖異而感報之心悉同凡  
霑雨露之民室家相慶獲際風雲之士冠冕增輝咸欲  
覩照臨之清光予以謝生成之大德臣心感激未能率  
領以來朝天闕遙深徒切仰瞻而下拜敢效華封之三

祝恭祈聖壽於萬年

進五經四書性理大全表

胡廣

伏以六經之道昭如日星經緯乎天地貫徹乎古今放  
之則彌六合卷之則退藏於密用之於身而身修行之於家  
而家齊推之於國而國治施之於天下而天下平蓋世  
必窮經而後道明未有舍經而能治理者也是以聖王  
垂憲必資道以開人賢哲肇基必稽古以作範故伏羲  
則河圖而演畫大禹因洛書而錫疇孔子刪詩書脩春

秋寓一王之法周公陳王業制禮樂弘百世之規況乎

精一執中之傳尤重丁寧告戒之旨如斯顯迹昭然可

觀自王道既衰異說蜂起燔烈秦火之餘穿鑿漢儒之

弊其間存者不絕如絲莫能究其旨歸一切趨於苟且

夤緣故習鮮克正之於乎聖人之道不行而百世無善

治聖人之學不傳而千載無真儒遂令往轍之難尋益發

前修之永歎夫否必有泰晦必有明繇夫濂洛關閩之

學興而後堯舜禹湯之道著悲掃蕪蕪之蔽大開正學



之宗不幸屢阢狂言既揚復抑又因循數百年之間卒  
莫能會其說于一蓋必有待於今日者矣天啟聖明誕  
膺景運我太祖高皇帝天縱之聖以武功定天下以文  
教興太平首建學校頒賜書籍作養人材茂隆政治四  
海外內翕然同風欽惟皇帝陛下文武聖神聰明睿知  
纘承大統紹述鴻勲成功盛德雖三皇而無以加事業  
文章與二儀而同其大治已至而猶以為未至功已成  
而猶以為未成體道謙冲遊心高遠乃者渙啟宸斷脩

輯六經恢拓道統之源流大振斯文之委靡發揮幽蹟  
鉤纂精玄博采先儒之格言以為前聖之輔翼合衆塗  
於一軌會萬理於一原地負海涵天清日皦以是而興  
教化以是而正人心使夫已斷不續之墜緒復屬而復  
聯已晦不明之蘊微復彰而復著肇建自古所無之制  
作續述自古所無之事功非惟備覽於經筵實欲頒布  
於天下俾人皆由於正路而學不惑於他岐家孔孟而  
戶程朱必獲真儒之用佩道德而服仁義咸趨聖域之

歸頓回太古之淳風一洗相沿之陋習煥然極備猗歟  
盛哉竊嘗觀之周衰道廢汲汲皇皇以斯道維持世教者惟  
師儒君子而已未有大有為之君能倡明六經之道紹  
承先聖之統如今日者此皇帝陛下所以卓冠百王超  
軼千古者也臣廣等一介書生麓知章句大學賢闕渾  
未造其間與圓冠方屨固慚列於章縫幸逢熙洽之時  
謬忝校勘之任每受成於指教亦何假於施為樂觀就  
編豈勝歡慶與天下而同惠於萬古而有光尊所聞

行所知求不負於教育正其誼明其道期補報於昇平  
無任瞻天仰聖激切屏營之至謹奉表隨進以聞

兩朝實錄成史館上表

楊士奇

伏聞上有堯舜禹湯文武之君斯有典謨訓誥誓命之  
紀當時所錄萬世攸師自漢以來暨于唐宋皆建史官  
專職紀述我國家奉天啟運聖聖相承大經大法明于  
上善政善教被于下萬方一統海宇清寧洪武以前神  
功聖德史氏所記具有成書欽惟太宗體天弘道高明

廣運聖武神功純仁至孝文皇帝剛健中正廣大欽明  
體天之心行天之道勵精為理躬儉愛人再奠邦家中  
興鴻業文治光昭於日月武烈弘靖於華夷大畧雄材  
茂功偉績規模弘遠卓冠百王欽惟仁宗敬天體道純  
誠至德弘文欽武章聖達孝昭皇帝孝友英明寬仁恭  
儉敬天法祖制治保邦明目達聰周詢民隱時使薄歛  
博施濟人撫盈成之運廣文明之化丕新政紀覃敷德  
澤晷月之內天下歸仁二聖升遐雲車益遠萬姓哀慕

海宇同情恭惟皇帝陛下文武聖神聰明睿智續承大  
寶君國子民推廣至仁繼志述事歌九功之惟叙得萬  
國之歡心上念祖宗功德之隆同符天地覆載之大宜  
宣昭於簡冊垂儀範於帝王宣德元年五月勅脩兩朝  
實錄命臣輔臣義臣原吉監脩臣士奇臣榮臣幼孜臣  
山臣英臣溥總裁臣棨臣英臣直臣述臣時勉臣習禮  
臣學夔臣循臣從善臣驥臣鶴齡臣洪臣永清臣叙臣  
曰恭臣敬臣翰臣雅臣翥臣繼臣中臣叔剛臣文奎臣

節臣錫臣夢纂脩發左右史臣之所記閱中外官府之  
所上兼考章疏叅之見聞編載事功必備著其本末纂  
述謨訓必致謹於精微闕制度者雖細不遺切幾務者  
雖明必審於紀叙聖神之道德如繪畫造化之功能儼  
諸形容誠難髣髴乃若附錄臣下必在究明是非訖五  
年正月恭成太宗文皇帝實錄百三十卷仁宗昭皇帝  
實錄十卷合百有四十卷謹繕寫上進伏念臣輔弼智  
識淺陋學術空疎曠歲月而久稽亦討論之惟謹方諸

良史深愧乏三長之稱監于先朝庶少資萬幾之暇

經筵謝表

知經筵事太師英國公臣輔同知經筵事少傅兵部尚  
書兼華蓋殿大學士臣士奇少傅工部尚書兼謹身殿  
大學士臣榮禮部尚書兼翰林院學士臣溥兼經筵官  
詹事府少詹事兼翰林院侍讀學士臣直少詹事兼翰  
林院侍講學士臣英翰林院侍讀學士臣時勉臣習禮  
侍講學士臣循侍讀臣衷侍講臣穀脩撰臣愉臣鴈等



茲者恭遇經筵肇啟聖學維新講讀侍臣咸膺恩澤謹  
表稱謝者臣輔等誠懼誠忤稽首頓首上言伏以天清  
地寧昭聖皇之統御時康道泰美文治之隆興日月光  
華中外忻悅恭惟皇帝陛下聰明睿智廣大寬仁尊尊  
親親崇兩宮之至養推恩布德得四海之歡心是以三  
光全而寒暑平五穀熟而人民育益勤稽古之學益弘  
養正之功謂易書詩禮春秋之文皆堯舜禹湯文武之  
道萬幾有暇恒親御於經筵多聞是求肆詳延於儒雅

用資啟沃用致進脩上以承帝王心法之傳下以錫臣  
民皇極之福光祖宗之洪業擴海宇之隆平臣輔弼猥  
以庸才咸叨榮命荷絲綸之飭勵繼宴錫之駢蕃於緝  
熙單厥心允協周成之德念終始典于學敬陳商說之  
篇

駕幸文淵閣謝表

楊榮

臣楊榮等茲者欽蒙聖駕臨幸文淵閣周視臣等寓直  
之所特頒恩命增益室宇魚賜飲饌器用周悉備至聖

恩廣大感戴惟深謹上表稱謝者臣等誠懼誠忤稽首  
頓首上言伏以日月光華當大聖龍興之運車書混一  
正文明天啟之時鑒御幸臨儒紳遭遇恭惟皇帝陛下  
聖神天錫剛健日新典章法度之弘脩功成理定華夏  
蠻貊之率俾近悅遠來萬幾餘閒怡神稽古六龍捧御  
寵顧延英上深軫於天心頻垂矜於寒士廣其室宇遂  
涼燠之攸宜給以饗殮兼什器之咸備凡百所用靡一  
弗周同乾坤覆載之恩踰父母生成之賜是皆皇上聖

仁廣大明睿照臨溥德澤於萬方施由侍從昭禮文於  
千載高出古今所以致海宇之雍熙所以隆皇圖於永  
久臣等深慙末學幸際明時被沐恩榮非名言之可罄策  
勵駑鈍豈報效之敢忘端秉寅誠恭陳申謝龍翔鳳翥  
瞻五彩於中天春育海涵祝萬年之聖壽

駕幸太學謝恩表

胡儼

國子監祭酒臣胡儼永樂四年三月初一日欽蒙駕幸  
太學謹奉表稱謝者臣儼等誠懼誠忤稽首頓首上言

伏以明德建中立百王之大法崇儒重道閱千載之宏  
規綸音渙發乎九重士氣聿增於六館懽均朝野慶洽  
天人恭惟皇帝陛下濟哲溫恭剛健中正仁義同於堯  
舜功烈邁於禹湯闕里詩書敬仰先師之如在震區聲  
教啟迪後學於無窮式崇舊章肇稱殷禮鑾輿幸臨於  
璧水縉紳圜集於橋門惟君惟師以教以食衣冠之美  
籩豆之序秩秩乎有容鼓鐘之音絃誦之聲洋洋乎盈  
耳自唐虞三代以來未有盛於今日者也臣儼等忝職

成均叨承寵遇敷言是訓永依日月之光華造士登崇  
願效涓塵之補報無任瞻天仰聖激切屏營之至謹奉  
表稱謝以聞

進寶錄表

王直

臣聞自昔帝王有大德以及於萬民則必有信史以傳  
於千古是故堯舜之道載諸典謨文武之政布在方冊  
漢唐而下皆有成書欽惟宣宗尊謚章皇帝剛健中正  
廣大高明繼祖宗之鴻圖隆慈聖之至養脩六府而備

三事親九族以和萬邦好生之德允洽於民心育物之  
仁實協乎天道有戡暴除亂之武有經天緯地之文聲  
教宣昭禮樂明備華夏蠻貊罔不率俾山川鬼神莫不  
底寧大畧雄才豐功偉烈輝映前代儀範後來奄龍御  
之上升切臣民之哀慕恭惟皇帝陛下聰明睿智文武  
聖神尊祖敬宗繼志述事上念先皇之德業必著簡冊  
以流傳爰敕儒臣纂修實錄啟蘭臺之所載細金匱之  
所藏徵諸官府之文書參以耳目之聞見大經大法備

究於精微善政善教致詳於本末言足為訓雖簡必書事  
之可師雖繁必錄造化生成之妙用莫罄於名言日月  
照臨之明亦豈容於繪畫至若臣下之附載勉盡是非  
之至公恭成宣宗章皇帝實錄一百一十五卷實訓十  
二卷及目錄凡例合一百二十九冊謹繕寫上進臣等  
愧膚淺之無庸屬編摩之甫就傳于來世永昭道德之光  
率是嘉猷茂衍太平之慶

賀新殿成表



伏以北京建極開萬方會同之都南面嚮明受一統華  
夷之貢宜規模之宏遠聳遐邇之觀瞻率土騰歡普天  
稱慶恭惟皇帝陛下剛健中正睿知聰明丕承列聖熙  
景運於太平茂育羣生暢淳風之清穆惟尊祖敬宗之  
大在繼志述事之能顧朝廷當備於崇嚴而宮殿必資  
於營構祇循舊典式閤鴻猷兆姓子來咸自樂以效其  
用庶邦星拱皆不勞而觀厥成巍巍麗紫微之高翼翼  
表宸京之壯續靈臺之贊詠誠儷美於周文紹總章之

達聰實比隆於虞舜仁恩溥博德化宣昭廣宅中圖治  
之謨恢保大定功之備本支繁衍宗社奠安臣欣遇盛  
時恭陳善頌仰皇明於八表如日之升祝聖壽於萬年  
與天同久

釋罪後謝恩表

陳循

臣陳循謹奏為謝恩事臣仰蒙皇上天地之大日月之  
明垂光於覆盆無幽不燭迴瀾於逝水無遠弗追拯念  
褒加哀矜憫恤臣不勝感戴之至理合謝恩臣循誠惶

誠恐稽首頓首百拜謹言恭惟皇上一德同乾坤之廣大咸覆載於萬方重華合日月之真明普照臨於八表如臣草茅之賤質亦蒙江海之深恩向被陷於下井落石之讐人遂謫以屯田備邊之戍卒斯須難保顛沛靡寧戰戰驚心惶惶度日萬幸仰賴天與皇上深恩厚德庇佑臣身處患難於四五年間臨萬死而得一生受艱苦於數千里外度危災而存殘喘茲蓋伏遇皇上聰明聖智寬裕溫恭如日方中極廣大高明之盛與天同久

盡財成輔相之功作之君作之師追配乎堯舜禹湯文  
武明其誼明其道務契乎易書詩禮春秋得萬國之歡  
心臻一統之盛治明見萬里之外尤嚴照於覆盆仁敷  
九域之中重發生於枯木孳孳養賢以及萬民之心切  
切愛人必先四窮之意雖愚臣薄命負尋章摘句之庸  
材荷聖主深仁除執銳被堅之重役恩命播傳於千里  
士庶忻聞懽聲振動於一家妻孥舞蹈幽壑春生於腐  
草廢爐暖發於寒灰繫鳥出籠復遂山林之素性涸魚

得水獲逃鼎俎之橫灾親恩豈能及乎君恩再造實不  
下於洪造雖百口粉身碎骨消埃莫補於河山縱九泉  
秘臯藏冤頃刻難忘於德澤恨筋力日衰於老病不能  
効犬馬以驅馳奈忠誠長激於心肝期永同葵藿之歸  
向竭一誠而祝望頌萬美以揄揚匪愚陋之私情誠華  
夷之通願敬天法祖聖明已超冠於百王納善用賢皇  
上實允符於二帝制治保邦之有道承先裕後以無虞  
是以三光全而寒暑時溥致百穀熟而民人育江河海

嶽重重輦固於四方子孫曾玄聖聖繼承於萬代得其  
位得其祿興隆遠紹於皇圖長如地長如天永久上同  
於聖壽臣謹齋沐昧死具表謝恩以聞

明文衡卷五